

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 102707 24 K
Visoko, 24.12.2024.godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog B.B. sina R. iz V., zbog krivičnog djela nasilje u porodici iz čl.222 st.1 KZFBiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0058093 24 od 11.06.2024.godine, na pretresu za izricanje krivično pravne sankcije održanom u prisustvu Kantonalne tužiteljice Andreje Božičković i optuženog B.B., dana 24.12.2024.godine, donio je i javno objavio:

P R E S U D U

OPTUŽENI: B.B., {...},

K r i v j e

Što je:

dana 06.03.2024. godine, na području općine V., u mjestu B., nasiljem, drskim i bezobzirnim ponašanjem ugrozio mir i psihičko zdravlje svojih roditelja R.B. i S.B., s kojim ne živi u zajedničkom domaćinstvu, na način da je pomoću fizičke snage razbio goblen koji se nalazio na zidu u dnevnom boravku, te sušilo za veš i jedan viseći kuhinjski element, a nakon što su njegovi roditelji odlučili da pozovu policiju i sve prijave u prisustvu policijskih službenika istima upućivao psovke i riječi prijeteceg sadržaja „jebo li vas Allah, pobit ću vas“, svjestan da će na taj način ugroziti mir i psihičko zdravlje svojih roditelja R.B.i S.B., što je i htio, na koji način je nasiljem, drskim i bezobzirnim ponašanjem ugroziti mir i psihičko zdravlje svojih roditelja,

čime je počinio krivično djelo nasilje u porodici iz člana 222. stav 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH,

i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 2(dva)mjeseca a koja se neće izvršiti ako optuženi za vrijeme od 1 (jedne) godine od dana pravosnažnosti presude, ne poćini novo krivično djelo.

Na osnovu člana 202 stav 1 u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala 30,00 KM, sve u roku od 30 dana, po pravosnažnosti presude pod prijetnjom izvršenja.

Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0058093 24 od 11.06.2024.godine, optužilo je B.B. ,zbog krivičnog djela nasilje u porodici iz člana 222.stav1.KZFBiH (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana 19.06.2024.godine. Na ročištu o izjašnjenju o krivnji dana 04.11.2024.godine, optuženi B.B. je izjavio da je kriv za krivično djelo nasilje u porodici iz člana 222. stav 1. KZ F BiH.

Na ročištu o razmatranju izjave o priznanju krivnje dana 24.12.2024.godine, sud se uvjerio da je optuženi B.B. izjavu o priznanju krivnje dao dobrovoljno, svjesno i sa razumijevanjem, kao i nakon upoznavanja o mogućim posljedicama ovog krivičnog postupka.

Sud je utvrdio da ima dovoljno dokaza o krivnji optuženog, nakon čega je prihvatio izjavu o priznanju krivnje optuženog i istovremeno odredio pretres za izricanje krivično pravne sankcije.

Sud je stekao uvjerenje da je optuženi B.B. počinio krivično djelo koje mu se stavlja na teret, a koje djelo je izvršeno na način, u vrijeme i u mjestu kako je to navedeno u dispozitivu ove presude nakon izvršenog uvida u predložene dokaze i to : zapisnik o saslušanju svjedoka - R.B., sin T. iz V., B. bb, - S.B., kći M. iz V., B. bb, - M.V., policijski službenik zaposlen u PS Vareš, zapisnik o uviđaju PS Vareš broj: 08-02-12/2-8/24 od 06.03.2024. godine, nalaz i mišljenje ljekara specijaliste JU Dom zdravlja Vareš broj: 752/24 od 06.03.2024. godine na ime R.B., nalaz i mišljenje ljekara specijaliste JU Dom zdravlja Vareš broj: 751/24 od 06.03.2024. godine na ime S.B., rješenje Općinskog suda u Visokom broj: 41 0 Pr 101308 24 Zm od 07.03.2024. godine, fotodokumentaciju PS Vareš broj: 08-02-12/2-7/24 od 06.03.2024. godine i izvod iz kaznene evidencije za osumnjičenog B.B. PS Vareš od 11.03.2024. godine.

Naime, priznanjem optuženog koje je u potpunosti i u skladu sa predloženim dokazima, nesporno je dokazano da je isti počinio krivično djelo koja mu se stavlja na teret.

Sud zaključuje da je optuženi navedeno krivično djelo počinio sa direktnim umišljajem, jer je bio svjestan svog djela i htio njegovo izvršenje, a sud u toku postupka nije posumnjao da na strani optuženog postoje okolnosti koje bi dovele u pitanje uračunljivost optuženog, jer iz predloženih dokaza ne proizilazi sumnja da optuženi nije bio u mogućnosti da shvati značaj svojih djela i da upravlja svojim postupcima u vrijeme izvršenja djela.

Stoga je sud optuženog oglosio krivim za navedeno krivično djelo i izrekao mu krivično pravnu sankciju.

Prilikom izricanja krivično pravne sankcije sud je cijenio optuženom B.B. kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćenju krivičnog postupka, kao i činjenicu da nije osuđivan .

Cijeneći utvrđene okolnosti na strani optuženog, sud je optuženom B.B. za navedeno krivično djelo na osnovu članova: 42., 49. i 62. KZ FBiH, izrekao uslovnu osudu, kojom se optuženom za počinjeno krivično djelo utvrđuje kazna zatvora u trajanju od 2 (dva) mjeseca, a koja se neće izvršiti ako optuženi za vrijeme od 1 (jedne) godine od dana pravosnažnosti presude, ne poćini novo krivično djelo, u uvjerenju da će se istom, ostvariti svrha kažnjavanja predviđena u članu 42. KZ FBiH, te postići kako opća, tako i specijalna prevencija.

Na osnovu člana 202. stav 1. u vezi sa članom 199. stav 2. tačka g) ZKP FBiH, sud je optuženog obavezao da plati na ime paušala 30,00 KM, sve u roku od 30 dana, po pravosnažnosti presude pod prijetnjom izvršenja.

Sudija
Avdija Avdić

POUKA: Protiv ove presude dozvoljena je žalba Kantonalnom sudu u Zenici, putem ovog suda, u roku od 15 dana od prijema presude, u tri primjerka.